

FRANCISCI VBALDI IVRIS CONSVLT⁶⁸

PERVSINI ORATIO AVENIONE

HABITA DIE XVII. DECEMBRIS M. DC. VIII.

IN AMPLISSIMO, ET PRIMARIO LEGVM

AVDITORIO, CVM EO PRIMVM DOCENDI

IVRIS CIVILIS CAUSA ACCEDERET.

36-6-C-13-



BIBLIOTECA NAZ.
ROMA
VITTORIO EMANUELE

A VENIONE,

Ex Typographia I. BRAMEREAU,
Ex Superiorum permissu.

M. DC. IX.

GRAND HOTEL
NEW YORK
NEW YORK

GRAND HOTEL
NEW YORK
NEW YORK



NEW YORK

NEW YORK

NEW YORK

ILLVSTRISSIMO
ATQVE AMPLISSIMO

S. R. E. CARDINALI SCIPIONI

BYRGHESIO LEGATO AVENIGNENSI DIGNISSIMO.

FRANCISCVS VBALDVS I. C. S. D.

ORATIONEM, à me hac in Vrbe habitam
ipsa primum die, qua in huius Nobilissimi Aue-
nionensis gymnasii primum ad docendum locū
conscendi, nunc autem multorum hortatu, & im-
pulsu potius, quam meo iudicio, editā ad te mitto (CARDINA-
LIS AMPLISSIME) testem, si minus eloquentia, quam in me
nullam esse sentio, neque ab homine Jurisconsulto magnopere
requirendam puto. at certē officij, & obsequij, quod sapientissi-
mo Auunculo tuo summo Pontifici Paulo V., quod tibi debeo,
debe boque dum viuam, vnus omnium minimus maximum:
quorū felicissimis auspicijs hac se Academia instauratam, or-
natā, & amplissimi honorarij à munificentissima hac ciuitate
constituti, accessione auctam agnoscit, quorum iussu ego ad ius
ciuile in ea publice profitendum me accitum, missum, eò magis
gloriarī possum, quò minus, qui accirer, mitterer, me fuisse di-

gnum intelligo. Ergò Orationem accipies tu quidem hilari es
facili vultu, quod mihi de te tua perpetua multis testata erga
me meritis benignitas pollicetur, & alij legent tuo ornatâ nomi-
ne multò libentius; sic ut cum non paucos conijciam fore, qui
querant, ecquid illi secuti fuerint, qui mihi editionis auctores
fuerunt, neminem tamen futurum putem, qui meum de ea, qualis
qualis illa sit, ad te mittenda consilium reprehendat: quippe
eiusdem nominis splendor cum depellet tenebras Orationis mea,
tùm præstringet forte oculos mentesque legentiũ, ut quidquid
in ea fuerit minus aptum, aut vix internoscant, aut certè con-
donent multo facilius. Vale. Auenione.

FRANCISCI VBALDI
IVRISCONSULTI PERVSINI
ORATIO AVENIONE HABITA

die XVII. Decembris M. D. C. VIII. in
amplissimo, & primario legum Auditorio, cum
eò primum docendū iuris Ciuilis
causa accederet.



VLGARIS est, & non solum cōmuni ho-
minum consensu, & rerum experimento re-
cepta sententia, sed in omnium penē mortaliū
ore contrita vox, naturalem esse hominis
cupiditatem discendi; qua ductus nihil non
sibi faciendum, & moliendum existimet, quò plurimarum re-
rum scientiam, & cognitionem assequatur; itaque non contē-
tus ijs, quæ domi, & in promptu habet. quæ cognoscere nullo
negotio possit, si quid etiam apud exteras nationes egregium,
si quid admirabile esse inaudiuerit, protinus sibi illud quoque
cognoscendum, ac cominūs conspicandum putat: superat iuga
montium penē inuia, & inaccessa viator nauus, maria tranat va-
stissima, & infesta, oblitus patriæ, parentū, vxoris, liberorum,
cæterarumque rerum carissimarum, vt ad opratam rerum co-
gnitionem peruenire possit. Quod si leuissimarum interdum
rerum scientiæ desiderium id efficere potest, vt nullo labore,
vitæque periculo, nullo sumptu abstineat qui sibi id proposuit,

vt illas ne ignoraret, quantò tandem vehementius eorù exci-
tari cupiditatē oportet, qui rerum præstantiū, & à vulgi captu
remotarum cognoscendarum studio teneatur? Testes sunt an-
tiqui Philosophi quam plures, qui quidem cū vel essent ipsi
suoapte ingenio, & industria perfectam disciplinarum omniū
laudabilium cognitionem assecuti, vel Academias domi habe-
rent omnium celeberrimas, in quibus assidua litterarū, & do-
ctrinarum omnium tractatio cuius facile discēdi sitim exple-
re potuisset, tamen exterarum etiam prouincias lustrabant, mon-
tes, & saltus traieciabant, nouos adibant populos, vt à nouis
præceptoribus noui aliquid semper addiscerent, & tandē post
longas peregrinationes, peregrinam quodammodò, & recon-
ditam ad suos sapientiam reportarent: sic celeberrimus Philo-
sophus Pythagoras, ille quinquennalis silentij cultor egregius,
& præceptor, qui professione Philosophiæ in extrema Italiæ
ora effecerat, vt in ea non nomen Græciæ solū, magnam enim
Græciam veteres appellarunt, sed eruditionem etiam, & cultū
doctissimæ illius prouinciæ liceret agnoscere, tamen discendi
studio ductus nauigasse in Ægyptum fertur, vt Memphiticos
vates audiret philosophantes, sic Anaxagoras, sic Crates The-
banus, sic Cleanthes, sic Democritus, dum sedulo perquirunt,
& inuestigant, vt eleganter scribit D. Hieronymus, toto penē
orbe terrarū fugiētes litteras, varia, & lōgissima emensi dicun-
tur itinera, ille ipse princeps ingenij, & doctrinæ Plato, quem
diuinum omnes, quem Phæbi filium Græci, quē Philosopho-
rum Deum Cicero nominat, cum patriā nactus esset illas om-
nium liberalium artium inuentrices, & cultrices Athenas. cū
præceptore vltus esset illo, vel diuino iudicio, sapientissimo
omnium mortalium Socrate, cum eius fama scientiæ iam non
Academiæ spatijs cōcluderetur, sed per vniuersum terrarū or-
bem diffusa,

bem diffusa, admirationem alijs adduceret, illi immortalem
 nominis celebritatem compararet, tamen & ipse Ægyptū di-
 ligentissimè peragrauit; & in Siciliæ insulam ter nauigasse
 perhibetur; vt ibi Architzæ illius tarentini dogmata, & philo-
 sophandi rationem cognosceret. O mirificum igitur, summeq;
 laudabile discendi studiū quid non efficit, simul atque
 hominis animum occupasti? Occupas autem ab ipso statim
 naturæ ortu, hic cibus, hic pastus hominis proprius est, quo
 alitur, ac reficitur; quo sustentatur, ac planè viuit; qui cum
 quamuis quietis sua natura cupidum, quamuis amantem pa-
 triæ, ac suorum, in remotissimas tamen regiones ablegat, &
 longissimas suscipere cogit peregrinationes. Cæterū licet hæc
 verissima esse, & semper senserim, & nunc ex hoc loco pu-
 blicè profitear, mihi tamen paulo attentius cogitanti veniebat
 interdum in mentem, ad hunc modum ratiocinari, si, qui dis-
 cendi, ac cognoscendi cupiditate adducti longe gentium
 peregrinati dicuntur, eos summis laudibus, & celebrauit anti-
 quitas, & vniuersa ad cælum extulit posteritas, illos certè nō
 mereri esse illaudatos, qui vt alios liberalibus artibus erudirēt,
 patriam sibi deferendam, atque ad exteras commigrandū na-
 tiones putassent; nam præterquam quod docere laudabilius
 est quàm discere, quod qui addiscit, id ipsum, quod scire cu-
 pit, sibi deesse præsefert, quo contra, qui docet, abundat; quā-
 ti illud æstimandum est, quod qui cognoscendi, & sciendi in-
 census studio exit, sibi consulit ipsi, & rem suam agit priuata,
 qui, vt alios erudiat, peregrinatur, publicæ prospicit multorū
 mortalium vtilitati? Itaque mihi quidem haud paulo præstā-
 tior superioribus Philosophis vnus videtur Peripateticorum
 princeps Aristoteles, alijs fortasse etiā nominibus, sed hoc certè
 potissimum, quod ij, vt discerent, fortasse etiam aliqua leuio-

rum rerum cognoscendarum curiositate adducti peregrinatores fuerunt, hic verò à potentissimo, & fortissimo Macedonũ Rege Philippo accitus, vt filium Alexandrum humanitate, & Philosophia informaret, comes ei postea à longissimorum itinerum, & maximarum victoriarum fuit. Quamobrem cum me Viri sapientissimi, quibus huius Nobilissimi gymnasij cura credita, & commissa est, quamuis ignotum vobis hominem, & longo terrarum marisque tractu à vobis dissitum, moti tamen iudicio, & auctoritate Sanctissimi D. N. Pauli quinti Pontificis Maximi, & Illustrissimi Legati vestri Cardinalis Burghesij, vocandum ultro, & amplissimo inuitandum honorario censueritis, qui vestram iuuentutem è superiore loco docendo instruerem, atq; erudirem, planè ita statuo, neq; quidquā mihi honorificentius potuisse contingere, neq; minimam me laudem affecutum videri posse, qui relicto patrio honestissimo gymnasio, in quo per aliquot annos, non sine aliqua hominum commendatione docueram, viā quamuis bene longā dare me, & ad hanc vestram celeberrimam, & florentissimam tum Urbem, tum Academiā conferre constituerim. Quā in re nolim sane illud quisquā existimet, me, propterea quod alios edoctrurus ex remotiori regione huc venerim, pulchriorem mihi, & beatiorem videri, quam Plato, aut Anaxagoras, aut alij præstantissimi fuere Philosophi, quos discendi adductos studio orbem terrarum peragrasse diximus, sed vt eò illustrius, & splendidius appareat beneficium vestrum, illa me superiora commemorasse: ad quod quidem beneficium prædicandum, & longissima oratione ornandum, vellem mihi ea superpeteret dicendi facultas, quæ in hominibus disertissimis, & dicendo exercitatissimis reperiri & admirationem omnibus excitare solet; nunc verò cum, & quam sim in dicendo infans, mihi conscius

mihi conscius sim & iam pridem seposito eloquentiæ studio
 longe aliam me studiorum rationem secutum esse intelligam,
 accidit perincommode, vt quam vobis debeo, & habeo gra-
 tiam, eam vix vsitata & vulgari oratione exprimere, ne dum,
 quod vellem, ac deberem, lectissimis ornare atque illustrare
 verbis possim. Sed omninò magnum mihi est constitutum in
 vestra benignitate subsidium, quam semel magna mea cum
 voluptate, & bono expertus, mihi vnquam defuturam non
 dubito, quaq; adducti, spero fore, vt hoc meum qualecun-
 que, quod vobis hodie præsto, officium, æqui bonique faciatis.
 Tria igitur enarrare institua breuiter, populari potius, quàm
 oratorio stylo, vt quoniam ad docendum venerim, quid tan-
 dem sim docturus, apud quos, ecquis ego, & quo sim genere
 interpretandi vsurus, aperiam: itaque implorata illa, quam in-
 uocat apud Platonem Callicles, Mnemolyne memoriæ Dea,
 aut potius potiore illo, ac veriore Dei immortalis numine, quod
 supplicibus, suæque opis egentibus nunquam non adest, iam
 exordiar, illud à vobis etiam atque etiam petens, exigui tem-
 poris mihi attentionem ne denegetis, & aures vt vestras, præ-
 teruolantis horæ spatio, nostra ne oratio præteruolet, enitami-
 ni. Iam, quod ad primum pertinet, neminem vestrum ignora-
 re arbitror, me non leuem aliquam, aut ludicram professurum
 artem, sed diuinam, atque admirabilem sacrarum legum sci-
 entiam, quibus nihil hominum generi vilius, nihil ad tuendam
 hominum societatem prouidentius à Dijs immortalibus con-
 cessum est; cuius quidem scientiæ etsi ea præstantia est, vt, sine
 cuiusquam præconio, sua possit esse dignitate commendatissi-
 ma, & verò eius laudes iam pridem ab hominibus ingeniosissi-
 mis, æternis sunt cõsignatæ litterarum monumentis, tamē fa-
 ciam non inuitus, vt ex ijs non nullas attingam modo, atque

delibem, non tam vt facultas ipsa laudetur, cuius dignitas nec laude augeri, nec minui vituperatione potest, quam & quòd non alienum existimo, initium alicuius disciplinæ profitendæ ab eius laudatione suscipere, & vt ingenui iuuenes, partim ad eam amplectendam eò acrius excitentur, partim se in eius studio artis versari, quam omni commendatione dignam esse audiunt, & gaudere, & gratulari sibi possint. Præcipua autem Iurisprudentiæ laus in eo mihi videtur posita, quod viri eruditi vniuersæ morali Philosophiæ tribuerunt, vt cum cæteræ artes aliqua tantum ex parte perficiant hominem, melioremque reddât, vt medica ars corpori curationem adhibet, Musica vocem modulatiorem reddit, Arithmetica in numerando eum, & rationibus subducendis, & supputandis facit acutiorem, similique modo de alijs dixeris, hæc tamē vna eam perficit hominis partē, qua homo est, nēpe rationē, atque animum; cuius quidem animi institutione, vt est apud Platonem, neque hominibus, neque Deo pretiosius quidquam aut est, aut vnquam erit; id quod facilius intellectum iri existimo, si ita ratiocinemur. Primum enim quod non nulli eloquentiæ adscribunt, vt cum in primæua illa rerum humanarum infantia homines in agris bestiarum more vagarentur, nec diuinæ religionis, aut humani officij rationem vllam colerent, eos dicant disertissimi cuiuspiam oratione in vnum esse primū locum congregatos, atque ad meliorem viuendi rationem traductos. id ego natura potius ipsa comparatum, & tributum ijs esse putauerim: natura enim ipsa hominem conciliat homini, atque alius vt alij aut consilio aut opibus prodesse possit, ad cætos hominum amandos, & celebrandos inuitat; vt cum cæterorum animantium, alia in abditissimis recessibus perpetuò latitent, alia per syngas & saltus ab omni aliena conuictu huc illuc dissipentur, homi-
certè

certè solū minime esse solūvelle, sed ad societatem communi-
tatēq; vitæ natū esse, perspicere liceat. demus igitur hoc naturæ, ~~et~~
homines in vnum coegerit, ac quodam inter se affinitatis vin-
culo obstrinxerit, sed vt postquam simul esse cæperunt, fidem
colerent, iustitiam retinerent, seruarent otium, demum vt vir-
tutem, vt laudem veram sequerentur, certè solis legibus ferri
acceptum debet, quibus præmia benefactis, pænæ vitij con-
stitutæ sunt, quibus rebus duabus totam temp. contineri, vnus è
septem sapientibus Solon dixit. Atq; inferuit quidem natura
communis omnium parens, atque accendit in hominum men-
tibus earum virtutum, quas dixi, & reliquarum omnium semi-
na quasi quædam, & igniculos: atque hinc fieri crediderim,
vt fidem fallere, promissa non facere, iuris iurandi religionem
negligere, aliaque eius generis quamplurima, grauias, & odio-
sa suapte natura plerisque hominum videantur: sed tamē quis
ignorat, quam imbecilla sint naturæ vires ad hominem in of-
ficio continendum, quàmque facile illa corruptrix animi cu-
piditas in humanas mentes irrepit, atque inuadat, nisi oppor-
tunis, & sapientissimis legum præceptis, quasi frænis quibuscūq;
coërceatur? Itaque si naturam sequeremur ducem, neque ab
optimis eius institutis deflecteremus, nihil necesse erat, ea legi-
bus vetari aut puniri, quorum conscientiam mens ipsa huma-
na reformidaret: sed quoniam eò iam progressa est hominum
fraus, & improbitas, vt naturæ ipsius leges sanctissimas negli-
gentes, in contraria ipsi studia trahantur, & quæ natura sunt
turpia, more iam effecerint, & consuetudine leuiora, ideo tot
diuini, & humani iuris volumina, tam multa plebiscita, sena-
tus consulta, edicta, constitutiones à viris prudentissimis diui-
no consilio editæ, promulgatæ, & litterarum monumentis cō-
signatæ sunt; vt hominis scilicet animus à vero & iusto aberras

ad rectum virtutis, & iustitiæ tramite remigrare, & in suum
natiuum honestatis, & probitatis statum vindicari possit; quæ
causa est, vt docti viri litteris prodiderunt, quoniam quod
propius ad naturalis legi similitudinem humanæ leges acce-
dunt, eò certior, ac laudabilior ea vitæ ratio sit, quam hominū
generi præscribunt. Atq; hoc, quod dixi, legum latorum pro-
positum. & consilium, nec ignorauit doctissimus philosophorū
Aristoteles, dum scripsit, legum finem esse, hominem bonum
efficere, & illud scite, vt omnia, Plato, & diuinè eiusmodi
commento expressit. Nam cum Iuppiter (inquit) animaduert-
tisset, homines, quamuis simul iunctos, & consociatos, tamen,
si nullis essent legibus, nullisque iustitiæ adstricti vinculis, fa-
cilè inter se tumultuari, & digladiari, adeo vt qui antea consue-
tudine, conuictuq; mutuo delectati fuerant, rursus alternis
læsi, violatiq; iniurijs, ab se inuicem longè cupidius separa-
rentur, quàm antea societatem, cæsusq; communes adamas-
sent, hæc igitur cum aduertisset Iuppiter, Vulcanum demisisse
è cœlo fertur, illiq; mandasse, vt res duas vitæ humanæ, so-
cietatiq; mutue conseruandæ valde utiles, & necessarias in
omnes simul homines dispergeret, ac disseminaret, pietatem,
& iustitiam, duo præstantissima diuinæ beneficentiæ munera,
quæ nomine potius, quàm re ipsa differunt, vt ab doctis viris
scriptum inuenio, cum pietas nihil aliud sit, quam iustitia diui-
na, quæ Deo tribuit, quod ei debetur, honorem scilicet, ac cul-
tum, quemadmodum humana iustitia, & quod ex ea derivatū
est, ius humanum unicuique reddit quod suum est. Diuina er-
go hæc scientia planè censenda est, quæ rei diuinitus elapsæ,
iustitiæ scilicet, notitiam profitetur, quæ Deum ipsum, vt au-
diuistis, agnoscere potest auctorem: Hinc enim etiam factum
esse putauerim, vt cum cæterarum artium inuētio humani esse
diceretur

74
diceretur ingenij, legum tamen originem tamquam rerum planè
cœlestium & diuinarum non nisi ad Deos ipsos immortales re-
ferret antiquitas : non solum enim Minoa Cretensium leges
ab Ioue, Licurgum lacedæmoniorum ab Apolline edidisse
legimus, sed etiam Solonem Atheniensium leges à Minerua, Za-
mollum Getarum à Vesta, Numam Romanorum ab Aegeria
accepisse, monumentis litterarum proditum est : hinc etiam
Platonem videmus cum scribere leges aggreditur, ab Adrastia
Dea quadam opem summis precibus implorare, atque omni-
no leges vel Themis, vel Cereris ipsi ferebantur acceptæ, quam,
eam ob causam à Virgilio legiferam appellatam esse credide-
rim. Iam verò quid ea præstantius scientia esse potest, quæ ius-
tum ab iniusto, æquum ab iniquo, rectum à prauo secernit, ac
separat, quæ ad virtutem præmio, vitium pœna prosequendum
tota pertinet? Ac fuit quidem apud veteres celebris sophistarum
quorundam opinio, quos exagitat in Protagora, & Euthide-
mo diuinus Plato, qui negabant, doceri posse virtutem; itaq;
summum virum dicebant Periclem, cum filios haberet adoles-
centulos, præstanti ingenio præditos, eos omni, libero viro di-
gna arte curasse instituendos, at in virtutis studio, in quo ipse
præstaret, nec esse à se eruditos, nec ut ab alio erudirentur, sibi
uuisse curæ: Hoc quale sit, videntur ij ad quos pertinet, sed ta-
men quis vnquam reperietur, qui præclara illa Iurisconsulto-
rum volumina vel per transfennam, ut aiunt, aspexerit, & virtu-
tem contendat doceri non posse? Nam qui tandem sunt qui
iustitiæ, præclarissimæ omnium virtutis, ut dicebam, quæq;
Aristotele teste, splendidiore & mirabiliore est hespero, atque lu-
cifero, vim, partes, fines docent? Iurisconsulti; qui nos insti-
tuunt, quales in patriam, quales in parentes, quales in amicos,
quales in nos metipsos esse debeamus? Iurisconsulti: qui,

si quando cum ratione digladietur cupiditas, tanquã cum modesta, & nulla in re graui domina, serua procax, adhiberi tradunt oportere illam libidinum omnium moderatricem temperantiam? Iurisperiti: quibus erudimur nostra tueri, nostris frui, ab alienis mentes, oculos, manus abstinere, quibus erudimur, bonos defendere, accusare & oppetere improbos, iniuriã nemini facere, illatã propulsare; quibus erudimur, quæ aduersus Deũ pietas, qui cultus sit adhibendus, quæ iurisiurãdi religio, quæ pactorum firmitas, & fides, nisi iurisperitorum libris? Itaque præclare Cicero testatus est, vnum sibi videri XII. tabularum libellum, si quis legum fontes, & capita tantum vidisset, omnes philosophorum bibliothecas, & auctoritatis pondere, & vtilitatis vbertate superare. Meritò igitur huius fructum scientiæ intelligens idem Cicero mentem, & animum dixit, consilium & sententiam Ciuitatis positam esse in legibus, huius dignitatem commendans Plato legem scripsit rem esse admirabilem atque diuinam, nomẽque apud Græcos habere à præstantissima rerum omnium humana mente deductum; huius vtilitatem sentiens Platonis auditor Aristoteles scriptum reliquit in polyticis, leges rerum. dominas esse oportere, & alibi, ἐν τοῖς νόμοις ἔννυ τῇ σωτηρίαν τῆς πόλεως, in legibus sitam esse salutem Ciuitatis. Atque sane quis non videt, si leges è Ciuitate tollantur, futurum, vt non solum, quid suum, quid alienum sit, quisq; ignoret, sed vt inde pax, tranquillitas, quies perpetuo absint, fraus, improbitas, violentia, & quæ ex his sequuntur mala, cædes, rapinæ, furta, stupra, tandem omne flagitiorum genus in eam continuò ad seiscatur? Apud Persas lege cautum fuisse accepimus, vt post Regum mortem, qui Regibus cariores fuissent, insigniora quæque scelera diebus quinq; committerent, non vt male agerent illi quidem, sed vt quàm malum

malum sit, discedi à legibus, exemplo edocti populi fideiores
sepolteà Regibus præberent, quos legum non modo obseruā-
tes esse nouerant, sed etiam administratos. Alia, quæ in hanc
sententiam dici possent, consulto mitto, & quod satis ea esse
puto, quæ dixi, ad legum scientiæ dignitatem significandam,
& quod nolim nimia earum commendatione eas apud vos vi-
liores quodammodo reddere, quasi imitari me putetis callidū
venditorem, qui quas res minimi æstimat, eas vel maximè di-
laudat; simul vt verè dicam, venit in mentem id, quod alicubi
scripsit js quem ego libenter sequor, diuinus Plato; diuinis sci-
licet de rebus modicè, & iciune si dicatur, dicentis infantiam
facile excusari, pictoris exemplo, qui si humanam rem aliquā
veluti hominis effigiem pingendam susceperit, ab eo verò ex-
acta tunc, & eximia in imitando industria exposcitur, sin res
cœlestes sibi sumpserit depingendas, vt solem, lunam, & reli-
qua sydera, satis videtur muneri fecisse suo, si vel leuicū aliquā
expresserit earū rerū imaginē; ergò cum legum maiestas, &
præstantia ea sit, vt inter res diuinas annumerentur, vt supra di-
ximus, nemo me iure reprehenderit, quòd earum laudes, quæ
infinitæ sunt, tenui orationis quasi penicillo adumbrauerim
potius, quàm expresserim. Venio igitur ad alteram orationis
meæ partem, in qua sentio vberrimum sese mihi offerre cam-
pum vestrarum laudum prædicandarum, & extollendæ felici-
tatis meæ; planè enim cum optabile est, omni dignam laude
scientiam profiteri, cuiusmodi esse legalem peritiā nemo
negat, tum verò si cui eius profitendæ prouincia obtingat
apud eas gentes, quæ cæteris humanitate, prudentia, studio
litterarum, aliisque plurimis laudibus antecellant, cum eo vero
præclare omnino agi, existimandum est. Quamobrem quis nō
mihi iure gratulandum censeat, cum singulari meo fato in hāc
nobilissimam

nobilissimam totius Galliae Prouinciam, eiusq; praeclarissimā,
& primariam Auenionensem hanc Urbem ad lus ciuile publi-
cè profitendum accitus, atque humanissimè inuitatus fuerim ?
Ecquis enim est, qui huius pulcherrimae, & felicissimae Re-
gionis ornamenta, laudes praekoniam ignoret ? Nam siue agri
vbertatem desideres, haec tellus, omnium feracissima, vix ho-
minum expectat culturam, quinsimo fructus vltro maximo cū
frenore reddit; hic Ceres, hic Pallas hic Bacchus domiciliū esse
contendit suum. & cum nemo facile iudicare possit, vter alteri
praestet, fatentur tamen omnes, sedem hic singulis esse summe
opportunam, atque accomodatam; siue cœli temperiem re-
quiras, hic neque hybernis frigoribus læduntur corpora, neq;
caloribus æstiuis terra finditur, sed quā fluminum aquis refri-
gerata perennibus, quā propinqui maris æstu tepescit ver no-
bis ferè perpetuum reddit: siue Urbis, & oppidorum multitu-
dinem, & frequentiam quæras siue portuum tutissimorum ca-
pacitatem, siue incolarum industriam, ingenium, probitatem,
lautitiam, hilaritatem, haec aliaq; multa, quæ sciens praetereo,
plena manu congersit in hunc, vt ita dixerim, Galliae ocellum,
& delicias, ille omnium bonorum auctor atque largitor
Deus. Meritò igitur cum Romanus populus tot exteras Pro-
uincias suo adiunxisset, & subiugasset imperio, hanc tamen v-
nam designabat eo, quod & hodie retinet, Prouinciæ nomine,
quasi peculiarem & propriam suam, sibi que vel ob eius præ-
stantiam, vel ob singularem erga se fidem, egregie carā: huius
prouinciæ opibus in decenali illa celebri administratione Iul.
Cæsar, & reliquos Galliae populos fregit, & ad plurimos illos,
quos ex omnibus ferè terrarum partibus retulit triumphos. &
denum ad vniuersi orbis imperiū viam sibi feliciter muniuit,
ac comparauit. Verum haec sunt illa quidem huic Vibi cum
reliqua

reliqua hac prouincia ferè communia, sed non minores sunt eius præcipuæ laudes, quibus inter alias plurimas Ciuitates excellit, maximis omnino par, & æqualis, nulla planè inferior iudicanda est. Quis enim primùm non miretur situs commoditatem, mænium elegantissimam structuram & admirabilem firmitatem, ædium, tum sacrarum, tum priuatarum amplitudinem, omnium vernalium rerum copiam, agri eximiam, quæ cū fertilitate certat, amænitas, ætè, uminis propter Urbis moenia bellissimè fluentis rapiditatē, pontis omnium celeberrimi magnificentiam, Ciuium præterea nobilitatem, & egregios spiritus, humanitatem in suos, comitatem in alienos, in Deum pietatem, in omnes mortales fidem? iure igitur optimo summi Romani Pontifices ante trecentos ferè annos, hanc sibi Urbē pro tutissima sede, temporibus Reip. ita postulanti bus, delegerunt, in eaq; per septuaginta ferè annos libentissimè consederunt, hoc fuit eis perfugium, hæc quies, dum Italia arderet bellis, æstualet incendijs intestinarū seditionū, cum huius demū felicissimæ Ciuitatis domicilio cōmutandū sibi putarūt illud theatrum vniuersi orbis, illam sedem religionis à D. Petro constitutam, illam deniq; urbem aliarum reginam urbium, & caput, Romam: Qua diuturna Romanorum Antistitum cōmoratione, nemo ignorat, quantum huic Ciuitati splendoris, quantum dignitatis accesserit, quantum præterea eius ciues amoris, & studij in eos susceperint, iam non modo eorum hospites, sed subditi Romane Ecclesiæ effecti, Clemente VI. regnante; cuius quidem studij, & obseruantiz sequentibus temporibus, signa quàm plurima, & argumenta dederunt, quæ commemorare me nihil attinet, ipsi vicissim summis prærogatiuis, immunitatibus, ac beneficijs à gratissima sede Apostolica affecti, atque honestati. Merito enim hanc Urbem Romani

Pontifices caput totius Pontificiæ prouinciæ, & sedem suorum
Præsidum, & legatorum esse voluerunt; merito eam Archie-
piscopali dignitate ornarunt, merito in ea constituerunt præ-
claram istam & celebrem, & in iure æquabiliter, & sancte di-
cendo non variam, aut versatilem, sed maxime omnium fir-
mam, & constantem Rotam. Sed nulla est huius Ciuitatis laus
amplior, & honestior, quàm quòd proximis superiobus annis
cum nobilissimum Galliæ Regnum immanissimis fluctuaret
discordiarum & bellorum procellis, cum fœdissimæ hominum
perniciose opinantium lues in omnibus prouincijs grassaretur,
cū nihil haberet antiquius quàm quib' reb' duab' vniuersorum
regnorū salus cōtinetur, religione erga Deū, aduersus Principē
fide, & obsequio, eas vt in his regionibus, vel labefactarent, vel
penitus etiā couelleret, atq; ex hominū mētibus exterminaret,
vna tamē Aueniensenis Ciuitas purissimā se in medio propin-
quarum prouinciarum cæno ab omni violatæ vel antiquæ re-
lionis, vel sacre Romanæ Ecclesiæ Imperij labe seruauit, &
quæ eius constantia est, & erga eam Dei beneficentia, perpetuo
vt spero, seruabit. Dies me deficiat, Auditores, si omnes huius
Vrbis Ciuium laudes, quas ipsi recte agendo præstiterunt, di-
cendo persequi velim, & verò notiores sunt, quàm vt inquam,
vel cuiusquam orationem desiderent. Illud tamen facere non
possum, quin non modo recenseam, sed summe laudem, atq;
commendem, quod ad cæteras laudes, illam præclarissimam
adiūxistis, nobilissimi Auenienses, quod volueritis hac vestra
in Vrbe florentissimum esse omnium doctrinarum gymnasiū,
in quo excolerentur ingenia, formarentur mores adolescen-
tum studiosorum, huc è proximis ac longinquis regionibus con-
fluentium: huc spectant tot honestissima iuuenum Collegia,
à maioribus vestris sanctè instituta, & eleganter constructa, à
vobis sapienter administrata. Et sane quid potuit excogitari,

aut iuuentuti vtilius, aut ad gymnasij conseruationem, & perpetuitatem opportunius, quam hæc collegiorum institutio? laudabilis enim illa vitæ, studiorumque coniunctio mire facit ad progressu eximios in omni doctrinarum genere breui spatio faciendos: nam quæ auditor excepit in schola fortius tenet, aut quæ non excepit, facile addiscit, dum ea domi ab alio conuicatore, & condiscipulo audire potest; ibi adolescentis vnus torpor, & in studijs languor, alterius indolentia, & exemplo excitatur, ibi demum pietas, quæ omnium studiorum est fundamentum, quæq; nos in omni vita comitari debet, imbibitur. Sed quemadmodum huius gymnasij beneficium quàm amplissimum esse voluistis, adeo vt illud non modo vestri Auenionenses adolescentes frequentent, sed exteri etiam quamplurimi ad illud ventitent, vel gymnasij ipsius celebritate adducti, vel moti pulchritudine Urbis, vel collegiorum, in quæ & ipsi humanissime recipiuntur, commoditate allecti, ita licet hæc Ciuitas tulerit omni ætate viros iuris ciuilis, & aliarum doctrinarum scientia instructissimos, quorum opera, & industria satis superque erat ad sustinendam, atque augendam, huius gymnasij famam, tamen quæ vestra fuit semper erga liberales artes propensio, superioribus annis viros omnium doctissimos, & in iure præsertim pōtificio, & ciuili profitendo, & docendo exercitatisimos, & celeberrimos cum ex alijs prouincijs, tum præcipuè ex Italia nostra honorificentissimis conditionibus ad vestram Urbem, & gymnasium euocastis; hic Oldradus, hic Bellamera, hic Paulus Castrensis, hic Io. de Garronibus, hic Bonifacius Vitalinus ante multos annos iura vel ciuilia, vel Pontificia interpretando maximam sibi, maximam huic Academix nominis celebritatem & splendorem attulerunt: hic Io. Franciscus Ripa J. C. celeberrimus nonaginta penè abhinc annis summa

cum eruditionis laude profiteri cepit: hic Andreas Alciatus, vir elegantissimo ingenio, & multiplici rerum ferè omnium scientia præditus, ætate iuuenis, & publice docendi ad eam diè insolens, sed vel exercitatisimis præstantior, è superiore loco pluribus annis docuit, & ex Italia iuris interpres accitus bonus, Italiæ redditus melior, ex Auenionensi fonte, & tyrocinio ad eam profluxit maturitatem, & famam, qua vel celeberrimos vita functos viuus anteiuit, & nunc mortuus an viuum aliquem parem habeat, ignoro: hic Æmilius Ferrettus maximum per aliquot annos docendo specimen dedit exquisiti ingenij, & recòdita doctrinæ, & tandem hic moriens, magnum sui omnibus bonis, & iuris studiosis desiderium reliquit; hic demum Io. Angelus Papius I. C. insignis, & facundissimus interpres diu profitendo viam sibi strauit ad alia Ecclesiastica munera, & honorum gradus in Romana Curia consequendos. Hisce veluti gemmis quibusdam hoc gymnasium antea collucens, & illustre, si ob varios præteritorum bellorum casus, aut quascunque alias ob causas proximis superioribus annis non clarissimum alicui factum videri poterat, maximam sanè prudentiæ laudè promeriti estis, Amplissimi Consules, ceterique ciues Auenionenses, quod superioribus mensibus diligenter egistis cum S. D. N. Paulo V. & Illustrissimo Legato vestro Cardinali Burghesio, vt suis auspicijs hanc Academiam in pristinum nitorem ac splendorem restituerent: quorum nutu, & iussu cum, vobis etiam benignè annuentibus, ego ad meam vobis hac in re qualècunque præstandam operam vocatus fuerim, sentio, quantum mihi sit oneris impositum, vt ne tanto aut testimonio, aut iudicio plane indignus existimer. Atque nunc ad postremam me orationis meæ partem peruenisse intelligo, in qua cum pauca quædam de me ipso, & studijs meis, ac de genere

interpretandi iuris ciuilis dixerò, perorabo. Cum igitur Perusiam natus essem, Perusiam verò cum dico, nemo existimet, oppidum me dicere sub Apennini iugis frigore enectum, aut niuibus conscriptum, sed Urbem ex Italia antiquissimis, nunc inter Etruriæ, & Ecclesiasticæ ditionis primarias, armorum & litterarum gloria, præcipuè vero Iurisciuiilis professione clarissimam, è qua præclara illa Iurisprudentiæ lumina effulserunt, Bartolus, Baldus, Angelus, alijq; quam plurimi, sed cū Perusiam natus essem, ab ineunte ætate Rhetoricæ, Poeticæ, Philosophiæ in honestissimo Seminarij Collegio per decem annorum spatium sedulo data opera, memini per id temporis, sæpe auditū me publicè sacris in ædibus orantē, nūc pro studiorum initio, nunc in Diœcesanis synodis, nunc in præstantium viro-
rum vita functorum laudationibus; memini etiam laudatas multis, & probatas iuueniles illas nostras exercitationes, can-
credo ob causam, vt ad grauiores, & sequenti ætate digniores disciplinas fierem capeffendas alacrior. Proinde cum sacrarum legum scientiam toto animo essem amplexus, ad quam eram tum communi nostris hominibus, & naturali propensione animatus, tum verò eius studio longè magis, domestico, & gētilitio exemplo incensus, & inflamatus, quippe qui ex Vbal-
dorum essem ortus familia, quæ Baldum illum, Angelū, Petrū, germanos fratres, & longam nepotum Iurisconsultorum seriē edidit, quorum famam doctrinæ, & in legibus interpretandis industriæ ad omnes iam gentes, quæ legibus viuerent, peruas-
sisse intelligebam, cum hæc igitur ita essent, atq; post aliquot annos doctrinæ insignia essem cōsecutus, publico statim decreto ius ciuile publicè in patrio gymnasio profiteri cæpi, in eoq;
docendi genere septendecim ipsos annos, nunquam intermissa opera, contriui; ad Messanenſe etiam gymnasium, sexto ab

hinc anno, honorificentissimo stipendio conductus, innox assiduis meorum Ciuium vocibus, precibusq; in patriam reuocatus. Atq; hoc tempore, quæ fuerit Iuuenum scholasticorum ex Romana, Etrusca. Umbra, atq; adeo totius Italiae, Gallorū prætereà, Hispanorum, Germanorum, Sarmatarum nobilitate ad me audiendum ventitatum copia, quàm fuerit ijs probata nostra, si minus eruditio, quæ, sentio, quam sit exigua, at certe opera, industria, & docendi sollicitudo, quàm præterea libenter plures Rom. Ecclesiæ Cardinales, alijq; Ecclesiastici proceres me dicentem, atq; docentem sæpe audiuerint, quàm etiam feliciter non nulli, dū Perusiæ litterarū studijs, me docente, operant darent penè ab meo fuerint auditorio ad Cardinalatū rapti, hæc, aliaq; eius modi ex aliorum malo vos, quàm ex mea oratione cognoscere In hoc rerum, & fortunarum mearum statu, binæ me superioribus mensibus litteræ exceperunt Illustrissimi atque Amplissimi Cardinalis Scipionis Burghesij, quibus de sanctissimi Pontificis Auunculi sui voluntate, instaurandi atq; ornandi huius gymnasij certiore me factum, monebat, non enim ausim dicere, rogabat, sed rogabam tamen, quæ est eius eximia, & summa, quam gerit, dignitati, æqualis humanitas, ut huius Academiæ primarium locum, honestissimis atq; amplissimis conditionibus propositis, acciperem; pergratum id futurum, adiiciens, optimo atq; Sanctissimo Principi Paulo V. abs quo testabatur, me electum, & nominatum ex multis vnum, quem tantæ rei præficeret. Nō potui, ut verè dicā, non admirari tanti Principis. patroni tanti singularem, incredibilem, ac pene ut ita dixerim, diuinam humanitatem, quod nulla mea prentatione, nullo ambitu, precibus plane nullis, sed sapte sponte hanc mihi sedem deferendam censuissent, in qua ex ætate temporibus viri clarissimi iurisq; scienti ornatissimi

maxima

maxima cum ingeuij, & doctrinæ laude floruiſſent. Itaq; reſcripſi in eam ferme ſententiam, vt me dicerem tâto oneri imparẽ, cupidiffimum tamen obſequendi, parendi: ſi qua mihi facultas eſſet, è ſuperiore loco docẽdi, eam ampliſſimo præſertim Cardinali Burgheſio, probe cognitam eſſe poſſe, qui noſtra opera per quinq; ferme annos vſus eſſet, quibus meo patrio gymnaſio tanquam ſyduſ fulgentiſſimum illuxiſſet, & meum auditorium, alioquin per ſe obſcurum, ornaiſſet, atq; illuſtraſſet: eam ſi operam ſibi placeret transferri ad huius nobiliſſimi gymnaſij commodum, & vſum, nihil repugnare me, quo minus vel cum ingenij, & qualiſcunq; de ſtudijs noſtris iam forte collectæ famæ periculo, fidei ſaltem, obſequij, & obedientiæ laudem referrem. Poſthæc Romam conceſſi, vbi Sanctiſſimo Pontifici pedibus exoſculatis, & ab eo benigne receptus, & humaniſſimis verbis diſmiſſus, vbi Illuſtriſſimum Legatum veſtrum frequenter allocutus, meamq; illi obſeruantiam, & vobis inſeruiendi voluntatem ceram sæpe teſtatus nihil potius habui, quam vt quam primum per occupationes li-
cuiſſet, & anni tempus, ad vòs cõuolare. Ita me Sanctiſſimi D. N. voluntate, Illuſtriſſimi Legati iudicio veſtrũ factum, vobisq; pene de manu traditum, vt qua beneuolentia, & humanitate ſuſcepitiſtis, eadem benignitatis, & conſtantiæ laude reuocimini foueatiſ, ne rogandos vòs quidem, aut monendos puto. Equidem, quod ad me attinet, ſentio oneris mihi impoſiti magnitudinem, ac pondus, noui imbecillitatem non ſolum ingenij, ſed etiam valetudiniſ meæ, qua plane vtor non firmiſſima, intelligo, quantum habeat momenti tot præſtantiſſimis viris, qui in hac Academia ſub extraordinarij profeſſoris titulo flourerunt, ſuccedere; ſcio, quod veteri eſt in prouerbio, quam difficile ſit, poſt Roſciũ in Orchestra placere: quod ſi vir eloquentiſſimus

quentissimus Antonius, ut apud Tullium legimus, magnopere
cavebat, ne Crasso oratori dicenti succederet, longe magis mi-
hi eiusmodi periculum fugiendum fuisse video; sed tamen ar-
duis, atq; honestis in rebus vel conatus ipse laudi semper fuit,
& quos assequi ob eximiam virtutem non possis, laudaberis cer-
te, si, quantum potueris, imitare; neq; enim si quis Achillis in
rebus bellicis gloriam consequi non potest, is Aiakis, aut Dio-
medis laudem aspernabitur, ut scriptum reliquit Fabius. Con-
tendam igitur omnes industriæ meæ nervos, in eaq; cogitatio-
ne dies noctesq; ero defixus, ut qui Sanctissimi Pontificis,
Amplissimi Cardinalis Legati, & demum vestro iudicio, Con-
sules perillustres, ceteriq; Ciues Auenionenses ornatissimi,
hunc primum & honestissimum gymnasij locum obtinue-
rim, eius dignitatem, si minus doctrina & ingenio, at certe la-
boribus, assiduisq; vigilijs pro virili sustentem. Genus vero in-
terpretandi quale nostrum futurum sit, forte si quaeritis, quod erat
postremum à nobis propositum, equidem vix possum paucis
potius id verbis in praesenti eloqui, quam in posterum reipsa
ostendere, & exprimere; sed tamen animaduerti duo esse ge-
nera iusciule interpretandi praecipua, & insignia, cum inter-
pretantium ipsorum auctoritate, tum vero etiam inter se iudi-
cij dissensione, atq; dissidio: alterum quod ij profitentur, qui
legum ipsarum verba, sensumq; tantum explicantes, iuris co-
gnitionem non nisi ex veterum ipsorum Iurisperitorum re-
sponsis, & principum constitutionibus nobis tradere conan-
tur, in eoq; ipso, latini sermonis, facultate, & elegantia adeo
praestant, ut qua veteres illi Iurisperiti munditia orationis, se-
natus consulta, plebiscita, edicta, & reliquas iuris partes inter-
pretati sunt, Papinianos dico, Ulpianos, Paulos, Marcellos,
aliosq; plures, ea plane, aut eius simillima nostri isti recentio-
res eorum

res eorum ipsorum Iuristconſtorum reſponſa, & Interpretationes nobis referant, atq; explanent : tales Italia, & Hiſpania, non ita multos, non nullos Germania, plures vero, intra centū proximorū annorū ſpatiū tulit Gallia, vt Alciatos, Vaccas, Ferretos Italia, Auguſtinos Hiſpania, Zaſios, Donellos, Vultēios, Scrhaderos Germania, Budæos, Cōnanos, Duarēnos, Barones, Coraſios, Balduinos, Ræuardos, Cujacios, Briſſonios, Muretos Gallia. Alterū vero docēdi gen^o ſecuti ſūt lōge plures, qui poſt Azonē, Accurſiū, & alios illi ætati ſuppare, ius ciuile verbosioribus cōmētarijs reſerſerūt, in quibus diſputationes attexūt ſubtiliſſimas, & copioſiſſimas in vtrāq; partē cōcinnatas, de ſingulis fere, quæ occurrant, argumētis, quiq; cētis quibuſdā doctrinarum limitibus ius noſtrum circumſcripſerunt; hiq; non tam leges legum aliarum allegatione & ſenſu interpretantur, quam cæterorum interpretum auctoritate, mutuam ſibi præſtantes operam, ſententias confirmanſuas, adeo vt id demum firmum, ratumq; habeatur, quod plurimorum interpretum communi quodam conſenſu videatur receptum. Atq; iſti quidē quorū maximam partē Italia protulit, mirū eſt, quā in docendo infantes fuerint, & impuro ſermone ſint uſi; aut potius non mirum eſt: vt enim flumina, quò longius ab ſuo fonte proceſſerint, eò videmus fluere magis turbida, & lutulenta, ſic cū iſti à veteribus illis legum capitibus, & puriſſimis fontibus non parum deflexerint, nemo mirari debet, ſi eos aliorum concurſantium riuulorum colluies inquinauit: quod qui in Bartoli, Baldi, Caſtrenſis, Alexandri, Iaſonis, Decij, Soccini, & aliorū eius generis innumerabiliū interpretum commentarijs paululum verſatus eſt, facile intelligit; & id certe non modo fatendū nobis Italis, ſed etiam ſummopere dolendum eſt, quod, quò propius à latio abſumus, eò minus latinè loquamur. Horum

quidem vtriusque generis interpretum, vtri laudabiliores, & ad excolenda Iuuenum ingenia vtiliores, & aptiores habendi sint, non est meæ aut facultatis, aut iudicij certò pronunciare, & litem secundum alterutros dare; illi quidem elegantes, suaves, & ijs, qui politioris litteraturæ studiosi sint, planè amabiles, paulo tamen sicciore, & ieiuniores, quàm vt ad hodiernam praxim, & iudiciorum stylum aptari possint; hi contra horridiores, & inculti, summe tamen in toto genere acuti, in refellendis contrarijs sententijs subtile, in suis confirmandis diligentes, & graues, in veterum placitis ad hodiernos mores inducendis, mire quidam ingeniosi, illi, quòd breuiore concinnant ad singula legum capita interpretationes, progressionibus vtuntur eximijs, adeo vt qui eam docendi formam sequatur, paucorum annorum spatio, quidquid continent vniuersi iuris ciuilis libri litterarum, tractare, & suis auditoribus enarrare, nò cum magno negotio possit: at contra horum vt interpretationes longiores, ita progressus tardior; vt illos qui dem cursoribus velocissimis comparare possis, qui mutatis subinde equis immensa conficiunt breui temporis spatio itinera, hi verò otiosiori, & pedestrium peregrinatorum persimiles videri possint, qui & pauciores terrarum oras perlustrant, & diutius in singulis immorantur, vbi per quietem & otium minuriora qualibet diligenter scrutentur, quæ modo scitu digna sint, quæ sit Ciuitatis, ad quam peruenerunt, origo, qui Ciuium mores, quibus regantur legibus, quo Principe, quæ ædificiorum priuatorum structura, quæ templorum magnificentia quàm affabrè strata viæ, quàm scite posita arces, quàm munita, quàm custodita, aliaq; eius generis sexcenta. In hac tam diuersa professorum eruditissimorum ratione docendi, & interpretaudi, difficilis sanè videtur deliberatio, vt dicebam, vtram probemus, vtram sequamur,

sequamur, hoc certe nomine posteriores istos Bartoli & Accur-
 sij sectatores laudabiliores videri posse, non negauerim, & quò
 fædiore stylo, cò candidiores animo iudicandos, quòd alterius
 sectæ politiores professores non insectantur, immo, si qua pos-
 sunt, ab ijs corrogant libenter, & mutuuntur, quæ ex ele-
 gantioribus doctrinis petita facere possint ad legis, vel, ut nunc
 loquimur, contextus, quem præ manibus habent, intelligen-
 tiam; at contra illorum ut ingenium elatius, sic scripta amario-
 ra videas in eos, quos contumeliæ ergò Accursianos, & Barto-
 listas appellant, quibus cum perpetuum sibi ferò bellum indi-
 ctum volunt, quos nullis, non verborum, aut technis eludūt,
 aut conuicijs incesunt; itaq; nihil tam pensi habent, quàm
 ut eos alicuius errati reos coarguant, & condemnent, non so-
 lum inauditos, sed longe antea vita functos, & conscriptos;
 in quod tamen erratum illi, viri plane optimi, ob bonarum lit-
 terarum ignorationem plerunq; impeggerint, vitio potius æta-
 tis, quàm suo. Sed ut ut sit, ego fui semper eius sententiæ, quā
 etiam alijs non nullis præstantissimis iuriconsultis placere vi-
 deo, ut utrosq; attingendos interpretes, utrosq; imitandos, le-
 ctitandos, perdiscendos auditoribus meis proponetē, utrosq;
 ego sequerer prælegendo, nec si Accursij, Bartoli, Iasonis, De-
 cij aliorumq; eius notæ scriptorum methodum interpretandi
 aliquando approbasse, & expressissem, continuò me ab illis ele-
 gantioribus alienum ostenderem; quos supra commemorauī,
 neq; contra, si hos nonnunquam adamassem, & essem secutus
 interpretando, necessario propterea alios non ita elegantes, &
 ornatos amandandos, & reiiciendos putarem. Ac Solò quidem
 sapientissimus alioquin Græcorum legem tulit, qua capite pu-
 niri eos iussit, qui, seditione commota, non se in alterutram
 partem dedissent, nobis tamen in hac litteraria, & quidem gra-

uilsima seditione aliter agendum puto, vt scilicet quantumvis ipsi inter se certent, atq; digladienter interpretes, nobis tamen eorum quemq; pugnare arbitremur, neq; pro singulis nos stare profiteamur, sed potius ex singulis decerpere, & deliberare conemur, quod ad nostra studia iuuanda, & subleuanda utcunq; accommodatum esse videatur. Itaq; quemadmodum in Romano senatu apud veteres more receptum fuisse accepimus, vt si quis ex senatoribus aliquid censuisset, quod alteri non nisi ex parte probaretur, iuiuberet eum qui censuerat, sententiam diuidere, vt quod sibi tandem placeret, seorsum eligere, & sequi posset, ita quæ vel hi, vel illi iuris interpretes scriptitarunt, secernamus, & seponamus censeo, vt quod apud singulos laudatissimum erit, approbare, & sequi in nostrum compedium possimus. Fateor quidem, quod ad me spectat, diutius me in Italorum interpretum docendi consuetudine fuisse versatum, & quæ in patrio gymnasio hominum doctissimorum inueneram impressa vestigia, ea me secutum, si minus feliciter, at certe non cum modica commendatione diligentia, atq; industria: eam igitur consuetudinem, neq; ego dimittere in animo habeo, neq; à vobis improbatum iri confido; itaq; disputationibus res agetur, in vtramq; partem compositis, Academico penè more, quibus veritas non secus, atq; è silice ignis eruitur, & exprimitur, atq; è Democriteo illo profundo quasi elata, in lucem hominum, conspectumq; producitur, quod genus profectum à Principe, & fonte Philosophorù Socrate, Plato diuinitus expressit, & in plerisq; ad Ethicè & Polyticè pertinentibus libris secutus est Cicero; vt iuris ciuilis scientia, quæ ex polyticis fontibus tota profluxit, aut cognoscenda, aut tradenda, satis apta, & opportuna methodus illa videri possit. Accedat, quod cum in hac florentissima Academia quàm plures

viri

viri doctissimi, & in omni iudicio politissimi, professi fuerint, 82
quos supra nominaui, duo tamē insignes & diutius in ea clarue-
runt, & vberiores posteris reliquerunt iuris commentarios,
hac in Vrbe concinnatos, & compactos, Io. Franciscus Ripa,
& Andreas Alciatus, Itali ambo, aut Cisalpini Galli ambo;
quorū vterq; Italicum prælegendi & disputadi morem hic re-
tinuit, & quæ docens prælegerat, eodem stylo litteris commē-
dauit; de quibus ita statuo vt Ripa quidem aut noluerit, aut
vix potuerit alio vti genere interpretationis, quippe, qui quāuis
alioquin summa eruditione, & præiudicio præditus, ele-
gantioris tamē doctrinæ non omnino peritissimus haberetur;
at vero Alciatum, omnium liberalium artium cognitione or-
natissimum, qui post Budæum proximus, iuris civilis libros
fere omnes ad antiquum nitorem, veramq; lectionem reuo-
care conabatur, tamen hac in Vrbe, certo iudicio eum; quem
dico, apud Italos vsitatum interpretandi modum, secutum vi-
demus; cum tamen in alijs Galliæ Urbibus, in quibus etiam
professus est, Gallicum potius approbauerit; vt ex ea re non so-
lum intelligi possit, ipsum in vtroq; genere magnum, & exi-
mium fuisse, quod nescio an alteri cuiquam pari cum laude
contigerit, sed etiam vtrumq; genus laudabile esse, tanti viri
exemplo, & præiudicio existimare possimus Tuebor igitur in-
stitutū meum vobis, vt arbitror, non inuitis, vt quæ in dispu-
tationem cadunt, nē mittam disputationibus terere, vt veri-
tas tenebris obducta eruat, & ab aduersariorum calumnian-
tium argumentis, quasi telis quibusdam vindicetur, & defen-
datur. Quod si alijs huius gymnasij præclarissimis interpreti-
bus alia forte prælegendi ratio in vsu est, nouitate saltem ipsa
nostram fore non ingratam puto: & alioquin satius videtur ex
duobus generibus profitendi iuris civilis, quæ supra proposui,

utrumq; vigere in Academia nobilissima, quàm alterum tan-
tum: cum ipsa varietas mirè possit auditores allicere, & in of-
ficio continere. Sed nimis multa hac de re fortasse effundo, cum
neminem plane futurum putem, qui me reprehendat, si homo
Italus, quæ in Italia vniuersa, recepta est ratio docendi, secu-
tus fuero, si in gymnasio Auenionensi eadem vtar methodo,
& stylo, quo in eodem gymnasio non modo Paulus Castrensis
ante ducentos annos, sed patrum nostrorum memoria Al-
ciatus, Ripa, quo in Gallia Decius circa hoc ipsum, quod no-
stris huiusce anni laboribus proponitur, bonorum possessionis
argumentum, vsus est. Quod si qui erunt, fore autem non pau-
cos certo scio, quibus alterius sectæ professorum & interpre-
tatio breuior, & oratio purior, & ornatior arrideat, ij faxo, vt
nec illorum interpretum, si qua erunt ab ijs acute excogitata,
& eleganter mandata litteris, in nostra legum interpretatione
desiderent; dicendi caractere, & stylo à nobis expressa, facili
potius, fereq; natiuo, & tamen, nisi fallor, latino, quàm dili-
gentius culto, aut artificiose pexo, & facto; scilicet vt erga eas
litteras, quæ honestissimo vocabulo appellatur bonæ, nō male
me esse animatum, eos agnituros, plane confidam. Nunc ad
vos tādē, studiosissimi iuuenes, postrema hæc orationis meæ
particula dirigetur, quos ad studia litterarum hortari non de-
beo, satis, vt puto, vestrapte sponte incensos: sed tamen ani-
madueritis, nihil prætermittere prudentissimos hos Vrios,
quibus hoc gymnasium curæ est, vt facilior vobis sternatur via
ad virtutem, & doctrinam, quam quæritis, adipiscendam: ha-
betis hic, eorum beneficio, tot viros doctissimos, Philosophiæ,
Theologiæ, Medicinæ, Iurisprudentiæ professores, quorum
opera omnis in vobis instituendis insumitur; vt sicut apud
Ægyptios singularum dicuntur esse partium corporis Medici,
ita vos

ita vos singulas ferè sapiētīæ, & doctrinæ partes à singulis pos-
 sitis professoribus haurire, atq; addiscere, quibus quidem,
 cum opera etiam nostra accessura sit, eam vestro vsui, & com-
 modo paratissimam semper fore polliceor. Intelligitis qua be-
 nignitate Sanctissimus D. N., & Illustrissimus Legatus hanc ve-
 stram Academiam ornandam, atq; augendam susceperint;
 cernitis quo studio Illustrissimus Prolegatus, & Illustrissimus
 huius Urbis Archiepiscopus idēq; gymnasij Cancellarius nobis
 semper præsto futuri sint: cuius quidem studij, summæq; qua
 præstant, humanitatis egregium dedisse perspicitis hodierna
 die argumentum, cum posthabitis grauioribus curis, quas ge-
 runt pro communi salute, impolitam hanc nostram orationē
 audire, & vnīuersum hoc auditorium suo honestissimo con-
 spectu decorare voluerunt: quamobrem incumbite, per Deos
 immortales, Iuuenes optimi, in hæc litterarū studia, digna inge-
 nio, digna industria, digna nobilitate vestra: ea vero dijs vobis
 q; fauētibus post hanc diē die tertia, quæ erit Saturni, hora nona
 matutina, hac nostra quātulacunq; interpretādī facultate iuuare
 incipiemus. Omnes igitur, iuuenes ornatissimi, industria pares,
 studio similes, volūtate ijdē ad virtutem & doctrinā properate,
 hac præsertim ætate, qua estis, planē ad discendum, omnesq;
 labores perferendos, aptissima; neq; enim Solonem audiendū
 esse Plato scripsit, cum is diceret, hominem senescentem posse
 in dies plurima discere, cum enim minus id posse, quàm curre-
 re: non sine magnis certe laboribus, quod vultis, assequemi-
 ni, sed non nisi magna vos præmia manent, si quod potueritis,
 enitemini; alios languor, & desidia delectet, vos nihil illitte-
 rato otio turpius iudicatote, alij corporis, & abdominis sui vo-
 luptates consecrentur, vos animum, quem nihil sponte
 ignorare Plato aiebat, doctrina, & cognitione depascite, alijs
 sit ob

sit ob somnum amica nox; vos eam habetote vestrorum
 laborum, atq; vigiliarum testem, alij deniq; ita vivant, v
 nihil eorū vita vel fædus, vel miserius existimari possit,
 vos ad eam, virtute, doctrinaq; duce contendite,
 quam pauci veram. norunt, paucissimi
 assequuntur, nemo non con-
 cupiscit, felicitatem
 dixi.

FINIS.

